

Forico Sechi
FIRMA... ISCULTA...
Premio speciale della Giuria
«Cesira Carboni Aru » (Logudorese)

Semus torra deo e tue,
che sun tottu sas olias,
e che tando, ancora, in cue
sa domitta, sa crisura:
in coro, un'intessidura
de sonnos e poesias.

Mih, sa 'idda, mih, su mare,
mih, sas barcas. Nois puru
'essiamus a piscare
isteddos, risos, colores,
milli 'asos de fiores,
sos carignos de s'iscuru.

Mih, sa luna. Acchè su chelu
cun su mare addae addae
chi si 'asan! Unu velu
ruku los unit. Profunda
s'intendet sa 'oghe 'e s'unda,
sa mantessi a torra e bae.

Mih, sa lughe chi si azzendet!
Tottu est che una 'ia.
Isculta, iscultu. S'intendet
de campanas sa sonada.
Bides? Ti ses sinnada
che a tando! «Ave Maria».

Aisetta. Mih, su 'olu

de sos ultimos puzones!
Sezzi chi su rusignolu
forsis cantat... l'hapo nadu?
Millu, iscultalu, est torradu
cun sas solitas cantones.

Intende, ancora, 'e su 'entu
tottu sas arrejadas!
Mih, su cuntrastu 'e s'arghentu
de sa luna in abba e terra...
s'uppa addae 'e s'alta serra.
Intè su passu 'e sas fadas.

Tottu est che tando Maria!
Incantu, palpidos, risos.
Totta s'antiga majia
nos ligat senza cannau:
finzas s'in coro s'astrau
hat fattu morrer sos risos.

Aisetta. Accantu, accantu
che a tando mi camina.
Lassa piantu a piantu
chi si miscen: tantu isfogu
torrat azzender su fogu
chi fit sutta sa chijina.

Damunos torra sa manu.
Tantos annos sun passados,
como, calchi pilu canu
hat in zuffos fioridu
ma no est tardu pro haer bidu
chi nos fimus isbagliados.

FERMATI... ASCOLTA...

Siamo nuovamente io e te, ci son tutti gli ulivi, e come allora è ancora lì la casetta, la siepe, nel cuore un'intessitura di sogni e poesie.

Ecco il paese, ecco il mare, ecco le barche. Anche noi uscivamo a pescare stelle, sorrisi, colori, mille baci di fiori, le carezze del buio.

Ecco la luna. Guarda il cielo con il mare lontano, lontano si baciano! Un velo rosso li unisce. Profonda si sente la voce dell'onda, la stessa che viene e va.

Ecco la luce che s'accende. Tutto è come una volta. Ascolta, ascolta. Si sente di campane il suono. Vedi? Ti sei fatta il segno della croce come allora! «Ave Maria».

Aspetta, ecco il volo degli ultimi uccelli! Siediti che l'usignolo forse canta... l'ho detto? Eccolo, ascoltalo, è ritornato con le solite canzoni.

Ascolta, ancora, del vento tutti i suoi discorsi! Ecco il contrasto argenteo della luna nell'acqua e nella terra... il respiro lontano delle alte montagne. Ascolta il passo delle fate.

Tutto è come allora Maria! Incanto, palpiti, desideri. Tutta l'antica magia ci lega senza funi: anche se nel cuore il gelo ha fatto morire i sorrisi.

Aspetta. Accanto, accanto come allora camminami. Lascia che pianto a pianto si mescolino: tanto sfogo tornerà ad accendere il fuoco che era sotto la cenere.

Diamoci nuovamente la mano. Tanti anni son passati; adesso qualche capello bianco è nei ciuffi fiorito ma non è tardi per aver visto che ci eravamo sbagliati.